

Newspaper	Utusan Malaysia
Date	11 March 2016

PNS sedia jadi orang tengah pertikaian Najib-Mahathir

um- 11/3/2016

SHAH ALAM 10 Mac - Majlis Permuafakatan Pertubuhan Bukan Kerajaan (NGO) Selangor (PNS) yang diketuai Majlis Bekas-Bekas Wakil Rakyat Malaysia (Mubarak) Selangor menawarkan diri untuk menjadi orang tengah bagi menyelesaikan pertikaian antara Perdana Menteri, Datuk Seri Najib Tun Razak dan Tun Dr. Mahathir Mohamad.

Pengerusinya, Tan Sri Abu Hassan Omar berkata, pertikaian pendapat sama ada bersifat peribadi atau sebaliknya seharusnya diselesaikan secara pertemuan dan perundingan.

Abu Hassan yang juga Yang Dipertua Mubarak Selangor menegaskan, tindakan Dr. Mahathir bersekongkol dengan kepemimpinan parti pembangkang terutama DAP dan PKR untuk menjatuhkan Perdana Menteri menunjukkan bekas Perdana Menteri itu tidak menghormati prinsip perjuangan parti, sistem demokrasi berparlimen dan Perlembagaan negara yang sebelum ini dipertahankan.

"Kami merasa amat dukacita dan kesal dengan tindakan Dr. Mahathir yang sanggup bersekongkol dengan pembangkang yang sebelum ini sentiasa membuat tuduhan, tohmahan dan fitnah kepada Barisan Nasional (BN) termasuk ketika zaman kepimpinan beliau sendiri.

"Tindakan ini amat bertent-

gan dengan kedudukan terhormat beliau sebagai bekas Perdana Menteri, Presiden BN dan UMNO serta negarawan ulung," katanya dalam sidang akhbar di sini hari ini.

Selain Mubarak Selangor, PNS turut dianggotai 11 NGO lain antaranya Veteran UMNO Selangor, Kelab UMNO Pesara Kerajaan Malaysia Selangor, Yayasan Kepimpinan dan Strategik Malaysia, Persatuan Veteran Angkatan Tentera Malaysia Selangor dan Institut Perkembangan Minda.

Abu Hassan dalam pada itu memberitahu, Mubarak Selangor dan PNS berpendirian tegas me-

nyokong kepemimpinan Perdana Menteri dan mahu ia diteruskan bagi memastikan program kerajaan berjalan dengan lancar dan mencapai matlamat.

"Pada masa sama, kami turut menyarankan agar penjelasan menyeluruh dan tepat diberikan kepada rakyat oleh kerajaan dan Perdana Menteri sendiri serta kepimpinan parti komponen BN di semua peringkat tentang isu-isu yang dibangkitkan rakyat.

"Dalam apa juga keadaan, kepemimpinan negara haruslah mengutamakan kepentingan parti, rakyat dan negara," tegasnya.

